

Inatsisartut suleriaasianni § 37 naapertorlugu Naalakkersuisunut apeqqutit matumuuna imaattut saqqummiutissavakka:

Apeqqutit:

1. Narsami agguaqatigiisillugu meeraq ataasiinnarluunniit angusaqarsimanngitsoq, qanoq paasineqassava?
 - a. Atuartut qassit pineqarpat?
2. Narsami pissutsit “*akuerineqarsinnaangitsut*” qanoq iliuseqarfigineqarpat?
3. Naalakkersuisumit Narsami pissutsit ilisimaneqalermata Kujallermi kommunalbestyrelsi attavigineqarpat?
 - a. Qanoq suleqatigiittoqarniarpat?
4. Agguaqatigiisillugu meeraq ataasiinnarluunniit angusaqarsimanngimmat, akisussasunut kommunimut, aqutsisunut il.il. qanoq kinguneqartitsisoqarpat?
5. Narsami pissutsit ilungersunartut pisut kinguneranik suut allanngortinneqarniarpat?
6. Arlaanik paasissutissanik apeqqutiginngisannik Narsami atuarfimmumut tunngasunik allanik peqaruit suuppat? Ilangunneqarnissaat kissaatigaakka.

(Inatsisartuni ilaasortaqaq Suka K. Frederiksen, Siumut)

Tunngavilersuut:

Ulloq 14.oktober Kultureqarnermut atuartitaanermut naalakkersuisoq apeqqarissaarfigineqarnerani naalakkersuisup ilisimatitsissutigaa kommuunit namminneerlutik ersarinnerusumik takusariaqaraat meeqqat atuarfiini angusat qanoq innersut.

Tassunga atatillugu oqaatigineqarpoq massakkoqqinnaaq Narsami pissutsit akuerineqarsinnaangitsut naggasiutigalugulu ilisimatitsissutigineqarpoq Narsami atuarfimmi ukioq manna angusat ima ajortigisut agguaqatigiisillugu meeraq ataasiinnarluunniit angusaqarsimanngitsoq.

Pingaaruteqarluinnarpoq pissutsit ajorpata pisortaqarfiit tamarmik annertusisamik pisussaaffeqaratta iliuseqarnissarput, minnerunngitsumik inuusuttorpasuit ingerlaqqinneq ajortoq eqqarsaatigalugit pingaaruteqarpoq ajortut ingerlatinneqaannaratik sukkasuumik iliuseqarfigineqarnissaat.

Kissaatigaara allannguutissat tamarmik ilisimatitsissutigineqassasut.